

CONTENU

Ce livre comprend les dix centuries
des *Prophéties* de Michel Nostradamus
reproduites ici à partir d'une édition publiée
vers 1605 et tirée du livre
Nostradamus trahi
d'Élisabeth Bellecour
publié aux Éditions ROBERT LAFFONT en 1981
(ISBN 2-221-00805-7).

Tous les mots de cette version de 1605
ont été répertoriés et définis dans le
Dictionnaire Nostradamus
de Michel Dufresne
publié aux ÉDITIONS JCL en 1989
(ISBN 2-920176-54-4).

CENTURIE

I

- ESTANT assis de nuict secret estude, 1,1
Seul reposé sur la selle d'aerain,
Flambe exigue sortant de sollitude,
Faict prosperer qui n'est à croire vain.
- La verge en main mise au milieu de Branches, 1,2
De l'onde il moulle et le limbe et le pied:
Vn peur et voix fremissent par les manches,
Splendeur diuine. Le divin pres s'assied.
- Quand la lictiere du tourbillon versee, 1,3
Et seront faces de leurs manteaux couuerts,
La republique par gens nouueaux vexee,
Lors blancs et rouges iugeront à l'enuers.
- Par l'vniuers sera faict vn Monarque, 1,4
Qu'en paix et vie ne sera longuement:
Lors se perdra la piscature barque,
Sera regie en plus grand detrimet.
- Chassez seront pour faire long combat, 1,5
Par le pays seront plus fort greuez:
Bourg et Cité auront plus grand debat,
Carcas. Narbonne auront coeur esprouuez.

- 1,6 L'oeil de Rauenne sera destitué,
 Quand à ses pieds des aisles failliront:
 Les deux de Bresle auront constitué,
 Turin, Verseil, qui Gaulois fouleront.
- 1,7 Tard arriué, l'execution faicte,
 Le vent contraire, lettres au chemin prises:
 Les coniuerez xiiij. d'vue secte,
 Par le Rousseau senez les entreprinses.
- 1,8 Combien de fois prinse cité solaire
 Seras changeant les loix barbares et vaines:
 Ton mal s'approche. Plus seras tributaire
 La grand Hadrie recourira tes veines.
- 1,9 De l'Orient viendra le coeur Punique
 Fascher Hadrie, et les hoirs Romulides,
 Accompagné de la classe Libyque,
 Temple Melites et proches Isles vuides.
- 1,10 Serpens transmis en la cage de fer,
 Où les enfans septains du Roy sont pris:
 Les vieux et peres sortiront bas de l'enfer,
 Ains mourir voir de fruit mort et cris.
- 1,11 Le mouuement de sens, coeur, pieds et mains
 Seront d'accord Naples, Lyon, Sicille,
 Glaiues, feux, eaux, puis aux nobles Romains,
 Plongez, tuez, morts par cerueaux debile.
- 1,12 Dans peu dira faulce brute fragile,
 De bas en hault esleué promptement:
 Puis en instant desloyale et labile,
 Qui de Veronne aura gouuernement.
- 1,13 Les exilez par ire, haine intestine,
 Feront au Roy grand coniuuration:
 Secret mettront ennemis par la mine,
 Et ses vieux siens contre eux sedition.
- 1,14 De gent esclaué chansons, chants et requestes,
 Captifs par Princes et Seigneurs aux prisons,
 A l'aduenir par idiots sans testes,
 Seront receuz par diuines oraisons.
- 1,15 Mars nous menasse par la force bellique,
 Septante fois fera le sang esprendre:
 Auge et ruyne de l'Ecclesiastique,
 Et plus ceux qui d'eux rien voudront entendre.

- Faulx à l'estang ioincte vers le Sagittaire, 1,16
 En son hault AVGE de l'exaltation,
 Peste, famine, mort de main militaire,
 Le siecle approche de renouation.
- Par quarante ans l'Iris n'apparoistra, 1,17
 Par quarante ans tous les iours sera veu:
 La terre aride en siccité croistra,
 Et grands deluges quand sera apperceu.
- Par la discorde negligence Gauoise 1,18
 Sera passage à Mahomet ouuert,
 De sang trempé la terre et mer Senoise,
 Le port Phocen de voiles et nefes couuert.
- Lors que serpens viendront circuir l'are, 1,19
 Le sang Troyen vexé par les Espaignes:
 Par eux grand nombre en sera fait tare,
 Chef fuir, caché au mares dans les saignes.
- Tours, Orleans, Blois, Angers, Reims et Nantes, 1,20
 Citez vexees par subit changement,
 Par langues estranges seront tendues tentes,
 Fleuves, darts, terre et mer Renes, tremblement.
- Profonde argile blanche nourrit rocher, 1,21
 Qui d'un abysme istra lacticineuse,
 En vain troublez ne l'oseront toucher,
 Ignorant estre au fond terre argilleuse.
- Ce qui viura et n'ayant aucun sens, 1,22
 Viendra le serf à mort son artifice,
 Autun, Chalon, Langres, et les deux Sens,
 La gresle et glace fera grand malefice.
- Au mois troiesime se leuant le Soleil, 1,23
 Sanglier, leopard, au champ Mars pour combattre.
 Leopard lassé au Ciel estend son oeil,
 Vn Aigle autour du Soleil voit s'esbattre.
- A cité neuue pensif pour condamner, 1,24
 L'oiseil de proye au Ciel se vient offrir:
 Apres victoire à captifs pardonner,
 Cremone et Mantouë grands maux aura souffert.
- Pendu, trouué, caché de si long siecle, 1,25
 Sera pasteur demy Dieu honoré
 Ains que la lune acheue son grand siecle,
 Par autres vents sera deshonoré.

- 1,26 Le grand du foudre tombe d'heure diurne,
Mal et predict par porteur postulaire:
Suiuant presage tombe d'heure nocturne,
Conflit Reims, Londres, Etrusque pestifere.
- 1,27 Dessous de chaine Guien du Ciel frappé.
Non loing de là est caché le thresor,
Qui par longs siècles auoit esté grappé,
Trouué mourra l'oeil creué de ressor.
- 1,28 La tour de Boucq craindra fuste Barbare,
Vn temps, long temps apres barque hesperique,
Bestail, gens, meubles, tous deux feront grand tare,
Taurus et Libra, quelle mortelle picque!
- 1,29 Quand le poisson terrestre et aquatique,
Par force vague au gravier sera mis,
Sa forme estrange suave et horrifique,
Par mer aux murs bien tost les ennemis.
- 1,30 La nef estrange par le tourment marin,
Abordera pres de port incogneu,
Nonobstant signes de rameau palmerin,
Après mort pille, bon aduis tard venu.
- 1,31 Tant d'ans en Gaule les guerres dureront,
Outre la course du Castulon monarque:
Victoire incerte trois grands couronneront,
Aigle, Coq, Lune, Lyon, Soleil en marque.
- 1,32 Le grand Empire sera tost translaté
En lieu petit, qui bien tost viendra croistre,
Lieu bien infime d'exigüe comté,
Où au milieu viendra poser son sceptre.
- 1,33 Pres d'un grand pont de plaine spatieuse,
Le grand Lyon par forces Cesarees,
Fera abbatre hors cité rigoureuse,
Par effroy portes lui seront reserrees.
- 1,34 L'oyseau de proye volant à la fenestre,
Auant conflict faict aux François parure,
L'un bon prendra, l'un ambigue sinistre,
La partie foible tiendra par bon augure.
- 1,35 Le Lyon ieune, le vieux surmontera,
En champ bellique par singulier duelle,
Dans cage d'or les yeux lui creuera,
Deux classes, vne puis mourir de mort cruelle.

- Tard le Monarque se viendra repentir,
De n'auoir mis à mort son aduersaire,
Mais viendra bien à plus hault consentir,
Que tout son sang par mort fera deffaïre. 1,36
- Vn peu deuant que le Soleil s'absconse,
Conflict donne, grand peuple dubiteux,
Profligez, port marin ne faict response,
Pont et sepulchre en deux estranges lieux. 1,37
- Le Soleil et l'Aigle au victeur parroïstront,
Responce vaine au vaincu l'on assure,
Par cor, ny cris harnois n'arresteront,
Vindicte Paix, par morts si acheue à l'heure. 1,38
- De nuict dans lit le supresme estrangle,
Pour trop auoir seiourné blond esleu,
Par trois l'empire subroge exaucle,
A mort mettra Garte et paquet ne leu. 1,39
- La trombe fausse dissimulant folie,
Fera Bisance vn changement de lois,
Histra d'Egïpte, qui veut que l'on deslie,
Edict changeant monnoye et aloys. 1,40
- Siege en cité est de nuict assaillie,
Peu eschappé, non loin de mer conflict,
Femme de ioye, retours fils defaillie,
Poison et lettres cachées dans le plic. 1,41
- Le dix Calende d'auril de faict Gothique,
Resuscité encore par gens malins,
Le feu estainct, assemblée diabolique,
Cherchant les os du d'Amant et Plelin. 1,42
- Auant qu'adienne le changement d'empire,
Il aduiendra vn cas bien merueilleux,
Le champ mué le pillier de Porphire,
Mis, transmué sus le rocher noilleux. 1,43
- En bref seront de retour sacrifices,
Contreuenans seront mis à martyre:
Plus ne seront moines, abbez, ne novices:
Le miel sera beaucoup plus cher que cire. 1,44
- Secteur de sectes, grand peine au delateur,
Beste en theatre, dresse le ieu scenique,
Du faict antique annobly l'inuenteur.
Par sectes monde confus et schismatique. 1,45

- 1,46 Tout apres d'Aux, de Lestore et Mirande,
Grand feu du Ciel en trois nuicts tombera,
Cause aduiendra bien stupende et Mirande,
Bien peu après la terre tremblera.
- 1,47 Du lac Lemman les sermons fascheront,
Des iours seront reduits par des semaines,
Puis mois, puis an, puis tous defailliront.
Les Magistrats damneront leurs loix vaines.
- 1,48 Vingt ans du regne de la Lune passez,
Sept mille ans autre tiendra sa monarchie,
Quand le Soleil prendra ses iours lassez,
Lors accomplir et mine ma prophetie.
- 1,49 Beaucoup auant telles menees,
Ceux d'Orient par la vertu lunaire:
L'an mil sept cens feront grand emmenees,
Subiugant presque le coing Aquilonaire.
- 1,50 De l'aquatique triplicité naistra,
D'un qui fera le leudy pour sa feste:
Son bruit, loz, regne, sa puissance croistra,
Par terre et mer aux Oriens tempeste.
- 1,51 Chef d'Aries, Iupiter, et Saturne,
Dieu eternal quelles mutations!
Puis par long siecle son maling temps retourne,
Gaule et Italie, quelles esmotions!
- 1,52 Les deux malins de Scopion conioincts,
Le grand Seigneur meudry dedans la salle.
Peste à l'Eglise par le nouveau Roy ioinct,
L'Europe basse et septentrionale.
- 1,53 Las qu'on verra grand peuple tourmenté,
Et la loy sainte en totale ruine,
Par autres loix toute la Chrestienté,
Quand d'or, d'argent trouue nouvelle mine.
- 1,54 Deux reuolts faicts du maling facigere,
De regne et siecles faict permutation:
Le mobil signe à son endroit si ingere,
Aux deux esgaux et d'inclination.
- 1,55 Sous l'opposite climat Babylonique,
Grande sera de sang effusion,
Que terre et mer, air, ciel sera inique,
Sectes, faim, regnes, pestes, confusion.

- Vous verrez tost et tard faire grand change, 1,56
 Horreurs extremes et vindications:
 Que si la Lune conduite par son Ange,
 Le Ciel s'approche des inclinations.
- Par grand discord la trombe tremblera, 1,57
 Accord rompu dressant la teste au Ciel,
 Bouche sanglante dans le sang nagera
 Au fol la face oincte de laict et miel.
- Tranché le ventre naistra avec deux testes, 1,58
 Et quatre bras, quelques ans entiers viura,
 Iour qui Alquiloie celebrera ses festes,
 Fossen, Turin, chef Ferrare suyura.
- Les exilez deportez dans les Isles, 1,59
 Au changement d'un plus cruel Monarque,
 Seront meurtris, et mis d'eux les scintiles,
 Qui de parler ne seront estez parque.
- Vn Empereur naistra pres d'Italie, 1,60
 Qu'à l'Empire sera vendu bien cher,
 Diront avec quels gens il se r'alie,
 Qu'on trouuera moins prince que boucher.
- La republique miserable infelice, 1,61
 Sera gastee du nouveau magistrat,
 Leur grand amas de l'exil malefice,
 Fera Sueue raurir leur grand contract.
- La grande perte, las que feront les lettres, 1,62
 Auant le Ciel de Latona parfait,
 Feu grand deluge plus par ignares sceptres,
 Que de l'on siecle ne se verra refaict.
- Les fleurs passez diminue le monde, 1,63
 Longtemps la paix terres inhabitees,
 Surmarchera par Ciel, terre, mer et onde,
 Puis de nouveau les guerres suscitees.
- De nuict Soleil ont penser auoit veu, 1,64
 Quand le pourceau demy homme on verra,
 Bruit, chant, bataille au Ciel battre apperceu,
 Et bestes brutes à parler l'on orra.
- Enfant sans main iamais veu si grand foudre, 1,65
 L'enfant royal au ieu d'estoeuf blessé,
 Au Puy brises fulgures allant mouldre,
 Trois souz les chaines par le milieu troussiez.

- 1,66 Celuy qui lors portera les nouuelles,
Après vn, il viendra respirer,
Viuiers, Tournon, Moutferreant et Pradelle,
Gresle et tempeste le fera souspirer.
- 1,67 La grande famine que ie sens approcher,
Souuent tourner, puis estre vniuerselle.
Si grande et longue qu'on viendra arracher,
Du bois racine, et l'enfant de mammelle.
- 1,68 O quel horrible et mal'heureux tourment!
Trois innocens qu'on viendra à liurer,
Poison suspecte, mal gardé tradiment,
Mis en horreur par bourreaux enyurés.
- 1,69 La grand montagne ronde de sept stades,
Après paix, guerre, faim, inondation,
Roulera loin abismant grands contrades,
Mesmes antiques, et grand foundation.
- 1,70 Pluye, faim, guerre en Perse non cessee,
La foy trop grand trahira le Monarque:
Par la finie en Gaule commencee,
Secret augure pour a un estre parque.
- 1,71 La tour marine trois fois prise et reprise,
Par Espagnols, Barbares, Ligurins:
Marseille et Aix, Arles par ceux de Pise,
Vast, feu, fer, pillé Auignon des Thurins.
- 1,72 Du tout Marseille des habitans changee,
Course et poursuite iusque aupres de Lyon,
Narbon, Toloze, par Bourdeaux outragee,
Tuez, captifs, presque d'un million.
- 1,73 France à cinq parts par neglet assaillie,
Tunys, Argal esmeuz par Persiens:
Leon, Seuille, Barcellone faillie,
N'aura la classe par les Venitiens.
- 1,74 Apres seiourné, vogueront en Empire,
Le grand secours viendra vers Antioche:
Le noir poil cresse tendra fort à l'Empire,
Barbe d'aerain se rostira en broche.
- 1,75 Le tyran Sienne occupera Sauonne,
Le fort gagné tiendra classe marine
Les deux armées par la marque d'Anconne.
Par effrayeur le chef s'en examine.

- D'un nom farouche tel proferé sera, 1,76
 Que les trois seurs auront fato le nom:
 Puis grand peuple par langue et faict dira,
 Plus que nul autre aura bruit et renom.
- Entre deux mers dressera promontoir, 1,77
 Que puis mourra par le mort du cheual:
 Le sien Neptune pliera voile noire,
 Par Calpre et classe aupres de Rocheual.
- D'un chef vieillard naistra sens hebeté, 1,78
 Degenerant par sçauoir et par armes:
 Le chef de France par sa soeur redouté,
 Champs diuisés, concedez aux gendarmes.
- Bazar, Lestor, Condon, Ausch, Agine, 1,79
 Esmeus par loix, querelle et monopole:
 Car Bourd. Tholoze, Bay mettra en ruine,
 Renouueller voulant leur tauropole.
- De la sixiesme clair splendeur celeste, 1,80
 Viendra tourner si fort en la Bourgongne,
 Puis naistra monstre de tres hideuse beste,
 Mars, Auril, May, Juing, grand charpin et rongne.
- D'humain troupeau neuf seront mis à part, 1,81
 De iugement et conseil separez,
 Leur sort sera diuisé en départ,
 Kappa, Thita, Lambda mors bannis esgarez.
- Quand les colonnes de bois grande tremblee 1,82
 D'Austere conduite, couuerte de rubriche,
 Tant vuidera dehors grande assemblee,
 Trembler Vienne et le pays d'Austriche.
- La gent estrange diuisera butins, 1,83
 Saturne en Mars son regard furieux,
 Horrible estrange aux Toscans et Latins,
 Grecs qui seront à frapper curieux.
- Lune obscurcie aux profondes tenebres, 1,84
 Son frere passe de couleur ferrugine,
 Le grand caché long temps sous les tenebres,
 Teindra fer dans la playe sanguinaire.
- Par la response de Dame Roy troublé, 1,85
 Ambassadeurs mespriseront leur vie,
 Le grand ses freres contrefera doublé,
 Par deux mourront ire, haine et enuie.

- 1,86 La grande Royne quand' se verra vaincue
Fera excez de masculin courage,
Sur cheual, fleuve passera toute nue,
Suite par fer, à soy fera outrage.
- 1,87 En nosigee feu du centre de terre,
Fera trembler autour de cité neuue
Deux grands rochers long temps feront la guerre
Puis Arethuse rougira nouveau fleuve.
- 1,88 Le diuin mal surprendra le grand Prince,
Vn peu deuant aura femme espousee
Son appuy et credit à un coup viendra mince
Conseil mourra pour la teste rasee.
- 1,89 Tous ceux de Illerde seront dans la Moselle,
Mettant à mort tous ceux de Loire et Seine,
Le cour marin viendra près d'haute velle,
Quand Espagnolz ouurira toute veine.
- 1,90 Bourdeaux, Poitiers, au son de la campagne,
A grande classe ira jusqu'à l'Angon,
Contre Gaulois sera leur tramontane,
Quand monstre hideux naistra pres de Orgon.
- 1,91 Les Dieux feront aux humains apparence,
Ce qu'ils seront autheurs de grand conflict,
Auant Ciel veu serain espee et lance,
Que vers main gauche sera plus grand afflict.
- 1,92 Sous vn la paix par tout sera clamee,
Mais non long temps pille et rebellion,
Par refus ville, terre et mer entamnee,
Mort et captifs le tiers d'vn millon.
- 1,93 Terre Italique pres des monts tremblera,
Lyon et Coq non trop confederez,
En lieu de peur l'vn l'autre s'aydera
Seul Castulon et Celtes moderez.
- 1,94 Au port Selin le tyran mis à mort,
La liberté non pourtant recouree:
Le nouveau Mars par vindicte et remort,
Dame par force de frayeur honoree.
- 1,95 Deuant moustier trouvé enfant besson,
D'heroic sang de moine et vetustique:
Son bruit par secte langue et puissance son,
Qu'on dira fort esleué le vopisque.

- Celuy qu'aura la charge de destruire 1,96
 Temples, et sectes, changez par fantaisie:
 Plus aux rochers qu'aux viuans viendra nuit
 Par langue ornee d'oreille rassasie.
- Ce que fer, flamme n'a scu paracheuer, 1,97
 La douce langue au conseil viendra faire:
 Par repos, songe le Roy fera resuer,
 Plus l'ennemy en feu, sang militaire.
- Le chef qu'aura conduit peuple infiny, 1,98
 Loing de son Ciel, de meurs et langue estrange.
 Cinq mille en Crete et Thessalie finie,
 Le Chef fuyant sauué en la marine grange.
- Le grand monarque que fera compagnie, 1,99
 Auec deux Rois unis par amitié:
 O quel soupir fera la grande mesgnie!
 Enfans Narbon à l'entour, quel pitié.
- Long temps au ciel sera veu gris oyseau, 1,100
 Aupres de Dole et de Toscane terre:
 Tenant au bec un verdoyant rameau,
 Mourra tost grand et finira la guerre.